



Sabtu, 01 Oktober 2022

Ogen: Daniel 2:14-23



Ia Mereken Kepentaren Dingen Pengertin



Pertoton megati jadi pilihan terakhir adi lit perbeben. Kenca iakap maka lanai tergegehi, lanai lit jalan keluar, nggo kerigegeheh maka ipasrahken me perbeben e man Tuhan. Lit ka kalak kurang tulus ras kurang tek nandangi kuasa pertoton e, emaka ertoto pe ningen la ia fokus, apaika sangana ertoto sapaat, la tempa niakapna lit kuasana. Endam rupa-rupa penggejapen kerna pertoton si lit i sekelewetta. Tapi situhuna mbue kal teridah bas Pustaka Si Badia kerna uga kalak si ertoto subuk secara pribadi bagepe pertoton sapaat mereken serpang puluh bas kegeluhenna. Contohna si Daniel ras teman-temanna. Daniel ngaloken sada berita maka raja paksana nembeh perbahan la lit ise pe kalak beluh, guru si baso, ahli perbintangan ras si erdahin bas istana si beluh ngantusi nipina. Nipi raja e tuhu- tuhu nguluti ukurna. Adi lalap kari la lit ise pe sibanci nuriken nipi e, maka kerina kalak beluh terus ibunuh. Daniel ras teman-temanna pe terancam. I tengah situasi si berbahaya e, minter dahi Daniel teman-temanna, ije iraskenna ertoto mindo perkuah ate Dibata. Ersapaat ia empatna, Daniel, Sadrah, Mesah ras Abednego (ay.18), pindona pemete ras kepentaren bas Tuhan nari ngantusi nipi raja e. I bas ayat 19 siidah maka *ipetangkas Dibata man Daniel kerina rahasia e arah sada pengenehenen*. Emaka kenca ialokenna jabapen Tuhan e, ipujina Dibata si mbelin kuasaNa e.

Senina Moria labo kurang gedang tan Tuhan lako nampati, ras la kurang metinggel Ia nandangi pertotonta. Tapi sada siperluken kita, adi lit perbeben bas geluh enda, tetap ban Tuhan jadi nomor 1 ras sada Ia kel ngenca jadi penggurunta. Bas Ia nari kap kepentaren dengen pengertin. HikmatNa ndatasi hikmat manusia. Ise ernalem baNa labo kecewa. Olanai andalken doni enda, andalkenlah Tuhan, la lit metahat bas IA.